

# *KE A TSEBA*

 Ruri re batho ba fuoeng monyetla ho ba mona hoseng hona, ho phela holim'a lefatše, ho bona nako e 'ngoe e khōlō ea Paseka. Kamehla Paseka e re tlisetsa e—e ntho khanyang hakakang, litšepo tse ncha. 'Me—'me e khōlō hakakang!

<sup>2</sup> 'Me itse ha ke kena phaposing motšeо mane hoseng hona, motho o kōpane le 'na a re, "Moena Branham, na u tseba e—e leseanyana, kapa ngoana e monyenyanе kapa motho e mong, ea rapeletsoeng Chautauqua ngoahola, le ne le tlameha ho ntšoa pelō, 'me ho rokelloe divalofo kapa ntho e etsoe ho eona." Ha thoe, "Lesea le folile, 'me le ka moahong hoseng hona, ho bua 'nete, eibile le lutse mona hoseng hona." Ke botle, mohlolomong re tla utloa bopaki ba lona pele re tšoarana le tšebeletso e 'ngoe. 'Me re batho ba thabileng feela.

<sup>3</sup> Joale ke tla kōpa Moena Neville ho bala palo ea Lengolo la Mattheu kapa Luka, le leng, la tsoho, haeba u eso le bale. Ana u entse joalo, moena? [Moena Neville o re, "Che."—Mohl.] Ka hona, re sa itokisetsa thapelo.

<sup>4</sup> 'Me joale tšebeletso ena, e tla lateloa ke tšebeletso ea pholiso. Ka morao ho tšebeletso ena, le ka ea ja borakefese ba lona. Hape, ka morao ho mono, re tla khutla ka mashome a mararō ka morao ho robong re qale tšebeletso e 'ngoe. Litšebeletso tsa pholiso li tla latela ka morao ho eo. Le tšebeletso ea kolobetso e latele ka morao ho eo.

<sup>5</sup> 'Me ke nako e babatsehang haholo ea kolobetso! Oh, banna! Tsaho! Ke ka lebaka leo re kolobetsoang, hobane O tsohile hape.

<sup>6</sup> Ke hopola le pele re hlaphisa bokolobetso mona, ke ile ka ba ba theolela nokeng mona, hoseng haholo, mesong ho batla ho hoamme serame, le ho kolobetsa batho tlase mono nokeng. Ntho e teng ka eona, feela, ke nako e khethhehileng. Paseka, ke nako e khōlō.

Ke ne ke shebile Moena Pat Tyler ea lutseng mane.

<sup>7</sup> Ke qoqile le motho feela maobane bosiu. Ka ntho eo, kōpano ea rōna ea ho qetela Oklahoma, ke lekile, ke a leka joale ('me ke tla tsebisa taba ena) ho lula kathoko hofihlela Molimo o mpiletsha ho etsa ntho, tšebeletso ea ka ea mela ea temoho ea moea, hobane ke nahana (ho qala) ho kena e—e tšebeletso ncha.

<sup>8</sup> Bosiu bo bong, ha ho motho ea tsebileng letho ka eona, ke e lekile ho ngoana ea tlileng kalaneng, a tsoetsoe e le sefov, moshanyana oa lilemo tse batlileng ho ba leshome le metso e tšeletseng. Eaba o hooeletsa hang, "Moena Branham, ke a bona!" 'Me mono, 'me Pat o ne a... Ty-... a eme haufi, hantle pel'a moshanyana, ha mahlo a hae a tutuboloha khetlo la pele

bophelong bohole ba hae. 'Me ka hona ke a tšepa lōna mona, litebello tsa lōna li khōlō, le 'na, ke shebeletse ho hong, eo Molimo ho re etsetsa eona, le ho re nyollela boemong bo holingoana le boo re kileng ra bo fihlela.

Joale a re inamiseng lihlooho tsa rōna thapelong.

<sup>9</sup> Ntata rōna ea Mosa oa Leholimō, joalokaha re phuthehile hoseng hona, mona kerekeng e nyenyane pel'a tsela, ruri re lebisa teboho ho Uena, ka sohle seo sena se se bolelang ho rōna, haholo hoseng hona ha Paseka. Hola Paseka e sa fihla, re ka be re sa ema maemong a rōna kajeno. Hoo, Paseka ke eona e tiisitseng lipallo tsohle tsa Molimo. E re tiiselitse tsona. Sohle seo A kileng a se tsepisa, sohle se nèpahalitsoe ka Paseka. Ke le leng la matsatsi a maholohali a mokete leo re ka le tšoarang selemong! 'Me re a kōpa, Morena, kajeno, hore U tselise lipelō tsa rōna re sa lutse, re lebeletse, le tlās'a litebello bakeng sa Moea o Halalelang, O tlileng ka morao ho Paseka, ho theohela lipelōng tsa rōna le ho re tselisa, le ho butsetsa tumelo ea rōna, ka litekanyo tse khōlō, hore re tsamaee bophelo boo Jesu a re laotseng ho bo tsamaea.

<sup>10</sup> Re rapella e mong e mong le e mong ka bonngoe, haholo bao ba koaletsoeng kahare ba sa khone ho etela litšebeletso nqa efe kajeno. Molimo, e ba le bona. 'Me a—a Paseka ena e ba fumanele Paseka ea sebele, ho phahamisoa liphateng, le matla ao 'mele oa bona o esong ho a tsebe pele bophelong ba bona. Aba sena, Morena.

<sup>11</sup> Moreri e mong le e mong, mohlanka e mong le e mong oa Hao lefatšeng ho pota kajeno, ea ketekang sehopotso se seholo sena, a apesoe a natlatfatsoe ka Matla, ho tlisetra phutheho tsa bona (linku tse lebeletseng) Lijo tseo Molimo o li boloketseng batho ba Oona. Aba sena, Morena. Re emetse kabelo ea rōna, ka boikokobetso, ka Lebitso la Morena Jesu Kreste. Amen.

<sup>12</sup> Ke tla re Moena Neville joale a bale Mangolo a tsoho. [Moena Neville o re, "Mattheu 28," 'me o bala Lengolo le latèlang—Mohl.]

[*Eitse qetellong ea sabatha, ha letsatsi le qalang veke le tla chaba, Maria Magdalena le Maria e mong ba tla bona lebitla.*]

[*Me, bonang, tšisinyeho e khōlō ea lefatše ea eba teng: hobane lengeloi la Morena la theoha leholimōng, la tla la phikolosa lejoe le neng le le monyako, la ntoo lula holim'a lona.*]

[*Sefahleho sa lona se ne se le joaloka lehalima, seaparo sa lona se le sesoeu joaloka lehloa:*]

[*Balebeli ba thothomela ke ho le tšoha, ba eba joaloka bafu.*]

[*Lengeloi la bua la re ho basali, Haele lōna le se ke la tšoha: hobane ke a tseba hoba le batla Jesu, ya kileng a thakhisoa.*]

[*Ha a sa le mona: hobane o tsohile, joalokaha a ne e boletse. Tloong, le bone tulo eo Morena a neng a beiloe ho eona.*]

[*Le mpe le phakise, le ye ho bolella barutuo ba hae hore o tsohile bafung; 'me, bonang, o ea le etella pele ho ea Galelea; le tla 'mona teng: Utloang, ke le boleletse.*]

[*Ba phakisa ba tloha lebitleng ka tšabo le ka thabo e khōlō; ba matha ba ea bolella barutuo ba hae.*]

[*Eare ba sa ea bolella barutuo ba hae, bonang, ba bona Jesu a ba khahlanjetsa, a re, Lumelang. Eaba ba tla ba mo tšoara maoto, ba mo khumamela.*]

[*Joale Jesu a re ho bona, Se tšoheng: e eang le bolelle banabeso hore ba ee Galelea, ke moo ba tla mpona teng.*]

[*Hobane ba tlohe, bonang, ba bang ba balebeli ba tla hae motseng, ho behela baprista ba baholo tsohle tse hlahileng.*]

[*Etitse hobane ba phuthehe le baholo, ba etsa morero, 'me ba nea bahlabani lichelete tse ngata,*]

[*Ba re, E reng, Barutuo ba hae ba tlie bosiu, ba mo utsoitse ba robetse.*]

[*Me leha 'musisi a utloa taba eo, ke rōna re tla mo kholisa, re mo sireletse.*]

[*Eaba balebeli ba nka lichelete, ba etsa kamoo ba laetsoeng kateng: 'me taba eo e tumile hara Bajuda ho fihlela kajeno.*]

[*Barutuo ba leshome le motso o mong ba ea Galelea, thabeng eo ba e laetsoeng ke Jesu.*]

[*Ha ba 'mona, ba mo khumamela: empa ba bang ba belaela.*]

[*Eaba Jesu o atamela a bua le bona, a re, Ke neiloe borena bohle Leholimōng le lefatšeng.*]

[*E eang ke hona, le rute lichaba tsohle, le ba kolobetse ka lebitso la Ntate, le la Mora, le la Moea o Halalelang:*]

[*Me le ba rute ho boloka tsohle tseo ke le laetseng tsona: 'me, bonang, 'na ke na le lōna kamehla eohle, ho isa bofelong ba lefatše. Amen. Sekheo lebanteng.*]

<sup>13</sup> . . . ho ekeletsa mahlohonolo a Hae palong ea Lentsoe la Hae.

<sup>14</sup> Joale re batla ho bolela, ho boela re tsebisa, hore litšebeletso, tsa hoseng, li tla tsoelapele ka mashome a mararo ka morao ho robong, hang ha re tsoile nthong ena, ea . . . tšebeletsong ea hoseng hona joale. 'Me hona re ho bitsa tšebeletso ea rōna ea ho

chaba ha letsatsi. 'Me rōna, re tšoere tse ling tsa lintho tse khōlo ho le tlalehela ka—ka likōpano tse fetileng. 'Me re batla lōna ba kulang le ba mahlomoleng, lōna bohole, ho tla ka tumelo hoseng hona, ho lumela hobane Jesu enoa ea tsohileng kajeno o a phela, 'me O tšoana le kamoo A kileng a hlaha kamehla. Ha A eso fetohé le ha nyenyané.

<sup>15</sup> Joale ke batla ho bala karoloana ea Lengolo mona, e fumanoa khaolonbg ea 19 ea Jobo, ho qala ka temana ea 15.

*Ba ahileng tlung ea ka, . . . makhabunyane a ka, ba ntalima joaloka hoja ke osele: ho bona ke ea sa tsejweng.*

*Ke bitsa mohlanka oa ka, ha a arabele; leha ke mo rapela ka molomo oa ka.*

*Phefumoloho ea ka e nkha ho mosali oa ka, le monko oa ka o mobe ho bara ba nama ea 'mè.*

*E, esita le bana ba nnyelisa le bona; ha ke re ke a tsoha, ba bua holim'a ka.*

*Ke tšabeha ho bao ke kunutang le bona: bao ke neng ke ba rata ba fetohile lira ho 'na.*

*Masapo a ka a khomaretse letlalo la ka le linama tsa ka, ke phonyohile ka thata ka letlalo la meno a ka.*

*Le nkauheleng, le khauheleng, oho lōna metsoalle ea ka; hobane letsoho la Molimo ke lona lee nkotlileng.*

*Na le ntłhorisetsang joaloka Molimo, ha le kholoe ke'ng ka nama ea ka?*

*Hola mantsoe a ka joale a ka ngoloa! hola a ka betloa bukeng!*

*A ke a ngoloe ka tšepe e betlang le ka loto lefikeng ka ho sa feleng.*

*Empa ke a tseba . . . molopolli oa ka o a phela, le hobane qetellong o tla ema lefatšeng:*

*'Me leha letlalo . . . le senyeha, ke tla bona Molimo ke se le nameng:*

*Ke tla o bona e le moemeli oa ka, . . . o bona ka mahlo a ka, e seng ka a e mong; pelō ea ka e hlolohetsoe hoo fubeng sa ka.*

<sup>16</sup> Ke ratile ho qotsa therò mona, e fumanoa ho Jobo 19 enoa.  
*Ke A Tseba.*

<sup>17</sup> Lekhatheng lena mopatriareka o be a batla a tšoana le rōna. A luketse mathateng a maholo, re ka re, "metsi a maholo," 'me a futha ka sefubeng. A lule thotobolong matsatsi-tsatsi, a leke ho tsoma mantsoe ho ikhohathsya, ho leka ho itholla letho ho mo natlafatsa, le ntho e ka—e ka mo tšelisang mohlang oo a bone bophelo ba hae ho eèna bo monyela.

<sup>18</sup> Tabeng ea pele, e ne e le leqheku, a batlile ho ba mashome a robong a lilemo, 'me letsoho la Molimo le mo otlide. Joale, re a tseba Molimo ha o a ka oa mo ama ka letsoho la Oona, feela Molimo oa lumella Satane ho mo ama. Molimo o ipoloketse baemeli ho phethisa lintho. Molimo ha o batla ho etsoe bobe, O lokolla Satane ho e phethisa. 'Me ha O batla hoba ho etsoe bottle, O ipoloketse bahlanka ba Oona bao O ba lokollang ho e phethisa.

<sup>19</sup> 'Me Satane o ne a amme Jobo ka morero, ho mo leka, kaha eèna le Molimo ba ngangisane. 'Me Molimo o no o boleletse Satane, "Ke na le mohlanka lefatšeng, ha ho ea tšoanang le eèna. Sohle seo Ke 'molellang sona, o ea se etsa. Ke monna ea phethehileng, le monna ea lòkileng."

<sup>20</sup> 'Me Satane o itse, "Ha U nka 'nea eèna feela, ke tla U rohakisa ka eèna pontšeng ea Hao."

<sup>21</sup> Jobo ha a ka a tseba lintho tsena tsohle tse etsahalang, taba ena ea lihela mopatriareka mahlomoleng a tebileng. Koana, ka mokhoa o itseng, hoba a amohuoe tsohle, a 'na a tiisetsa malulo a hae ho—ho Kreste. "Ke a tseba hoba Molopelli oa ka o a phela," o boletse.

<sup>22</sup> Joale re fihla litulong tseo. Bohle re a fihla. 'Me ke lumela kajeno, re phuthehile ka morero o batlang o tšoana le oo. Bohle re holim'a lithotobolo. Re hlaheloa ke mathata, le meepa le metheo ea röna, le linako tsa röna—tsa röna tse bohloko, le maloetse a röna, le lipelö tsa röna tse robehileng, le masoabi a röna. Ka hona re tla ka tsela ena, hoseng, hoseng hona ha Paseka, ho iphumanela mantsoe a tšelisang, joaloka Jobo ha a lekile ho a anya ho metsoalle ea hae.

<sup>23</sup> Ha a khona ho tšelisoa ke mang ho bona. Ka lebaka la bothata ba hae, ba mo qositse ba re ke moetsalibe oa lekunutung. Eaba, mehleng ea bothata boo bohle, Molimo o fihla ho mo loanela.

<sup>24</sup> Jobo o ipotsitse. Joalokaha a tsebile, hoba boloetse ba hae le mathopa a hae, le mathata le lipelö tse bohloko, ka baka la ho lahleheloa ke lelapa la hae le leruo lohle la hae, li ne li sa tlo tlosa bophelo ba hae feela; empa e ne e le leqheku la monna, a se a holile lilemong, 'me o tsebile a tla theohela lebitleng. 'Me, ka ho tseba seo, o lumetse a tlisitsoe lefatšeng ke motho e mong, a sa itlisa mona feela. 'Me o tsebile a tsoile ho ntate le 'mè, empa, koana, ba tlamehile ba be ba tlisitsoe ke ho hong. 'Me e tla boela e phikoloha e khutlela tšimolohong, "Ke mang ea tlisitseng oa pele, oa qalong?"

<sup>25</sup> 'Me eaba o ipotsa sena. "Ho a makatsa ke 'na enoa, ke tsamaea hohle, ke bophelo bo holingoana le ba phoofolo, le bophelo bo holingoana le bophelo ba semela." Empa koana re mo fihlela a itse, "Sefate ha se eshoa, se tla boela se phela. 'Me e—e palesa ha eshoa, e tla boela e phela." Empa o itse, "Motho o robala fatše, o nehela moea, ebe o kae? Bara ba hae ba tla

hlomoha holima hae ba mo hlompha, athe ha a lemohe.” ‘Me a ntse a ipotsa, “Ebe molato ke ofe ha—ha Molimo o ka boela oa phelisa bophelo bo kang boo, ba lipalesa le limela, feela motho ha a hlotse a phetse?” Eaba o tsielitsoe ke sena sohle.

<sup>26</sup> ‘Me hola hoseng hona re ka ntša kakaretso ena. Ke morero oa rōna mona. Re utloile pale ea Paseka, hape le hape, re e balile re ea morao le pele; ‘me kajeno, khasong ea diradio tsa lōna, le tla e utloa e atameloa ke bareri ba fapaneng. Empa ke ne ke hopotse, molemong oa sehlotšoana sa ka mona hoseng hona, Morena ha o ‘neile, ke tla e atamela ho tsoa ntlhakemong e fapaneng holane nka khona, ho fihla malulong ao: Hobaneng re kena mathateng ao? Hobaneng lintho tsena li hlaha? Hobaneng Mokreste a tlameha ho tsieleha le ka mohla? Hobaneng ntho e ‘ngoe le e ‘ngoe, e sa tsamaele Mokreste ka phetheho feela? Empa ha e etse joalo, ‘me rea e tseba.

<sup>27</sup> ‘Me ka linako tse ling re hlaheloa ke mathata a mangata ha re fetoha Mokreste ho feta mohla re leng baetsalibe. Ehlide, E ngoliloe joalo ho thoe, “Mahlomola a motho ea lōkileng a mangata, empa Molimo o mo loela ho ona kaofela.” Molimo o tsepisitse mahlomola a mangata, maikutlo a hlollang, le lintho tse makatsang tse tla sita kutloisiso ea rōna, empa li hlahisoa molemong oa rōna kamehla. Re mpa re sa e utloisise feela, hobane, holane ra etsa joalo, e ka be eba ha se tumelo ho rōna; re ne re tla tloha ka kutloisiso. Empa re etsa joalo, ‘me re a e fumana, ‘me re lumela ka tumelo, Lentsoe la Hae, re re e tla re sebeletsa molemo. Holane re ka e qhautsa kajeno, hoseng hona—hona. Holane re ka utloisia hobane mathata a rōna ohle... ‘Me ha ho le a mong hara rōna ea sa kenyeltoang ho ona. ‘Me holane re ka elelloa hoba lintho tseo li etsetsoa molemo oa rōna!

<sup>28</sup> Ho ngoliloe, Mangolong a mang kahara Bibele, ho thoe, “Liteko tse liheloang holim’ a rōna, li theko e thata li fetisa le eona gauta ka bohlokhoa, hoba ke Molimo o re hlahisetsang liteko tsena.” Hoba re fetoha letlotlo la Hae, maipolelo a rōna le kolobetso ea rōna, le tsepiso ea rōna bophelong ho tsamaela Eèna, ke moo teko efe e re hlahelang e reretsoeng ho re phethisetsa Khanya ea Hae. E reretsoe ho re fihlisa moo Molimo o ka Inètefatsang ka ho fetisang ho rōna ho feta kamoo A neng a le kateng pele teko e fihla.

<sup>29</sup> Ke batla ho kena le Jobo tabeng ena, ho ipolela ke phetse halelele ho lekana ho e tseba hobane ke ‘Nete. Ke e bone bophelong ba ka ka sebele, hore nako le nako ha maemo a maholo a hlaha, ke sa khone ho a koekoetla, kapa tlas’ a ona kapa ho a tlola holimō, Molimo o etsa tsela, le ho tsoa ho eona ka khanya. Ke ipotsa kamoo mohau oa Hae o e phethisang le ka mohla, empa O a e phethisa.

<sup>30</sup> ‘Me le hopole, linthong tsena tsohle, Satane o a hlaha o leka ho re ferekanya, le ho re tsietsa, re tle re nahane, “Oh, ebe

taba *ena* e hlahile joang? Hobaneng ke ne ke sa lōkela ho ba ka tsela *ena*?"

<sup>31</sup> Matsatsi a 'maloa a fetileng ha ke tsoa tulong e botle bo fetisang, le tulo e tlokomang ka ho fetisa eo nkileng ka e bona bophelong ba ka, e le moaho o moholo oa moena oa rōna, Oral Roberts. Hoba ke bone mabole o matahaneng, ho se fesetere hohle ho ona, empa o ne o hlophisitsone hona! 'Me nkile ka kena Hollywood ke kene matlung a likhosí, ke ile hohle moo ke khonneng, nka rialo, lefatše ka bophara, le litulo tsohle tse mahalihali, libaka tse ntle le lelapa, empa ha ke eso bone ntho efe, tulong efe, e ka bapisoang, le eona, ha ho nqalo ho hang. Literata tsa alumiamo li lohiloe e—e kahare 'moho, 'me, oh, ha ke eso bone ntho e babatsehang hakaalo bophelong bohle ba ka. Eitse ha ke tsamaea mono, ke silila litšiea tseo ka matsoho a ka, le—le kranaete e khōlō, tsohle li bopiloe ka tšobotsi ea botrinitase ba Ntate, Mora, le Moea o Halalelang, e—e ho betloa ha eona. Lintho tseo tsohle! Ke sa tsoa khutla ho ea Moena Tommy Osborn, 'me ke bone mosebetsi oa hae oa motonana, o moholo mono oa Morena.

<sup>32</sup> Ka ema ka ntle, ka shebella moaho oo, ka nahana, "Molimo, 'na ke hlile ke moikaketsi, ke hlile ke mokhesuo, nqa e 'ngoe; hobane, litšebeletso tsa banna bana li tsoile ho ea ka." 'Me ka nahana, "Eng? Ekaba ha ke tsepahale, Morena, ha U sa ka ua ntsepela selo se joalo. Esita le bohashana, didolara tse 'maloa tseo U ntumeletseng ho lefa matšolo le lintho, joale ba leka ho ntlhahlela chankaneng ka tsona. 'Me hobaneng ke le moikaketsi hakaale, kapa hobaneng ke le motho ea sa tseptjoeng hakaalo?"

E ne e le ha ke lutse thotobolong, joaloka Jobo oa mehleng.

<sup>33</sup> Eitse ke sa eme ka ntle mono, phefumoloho ea ka ea batla e hlolleha, boholo boo; moshanyana eo oa mofumanehi ea hlahetseng mosimeng oa phokojoe, Mopentekosta, a ka hlahisa moaho o moholohali oo. 'Me ka nahana, "Oho Molimo, mohlomong ha ke na tokelo."

<sup>34</sup> Lekhatheng leo feela Puo ea neheletsana maboteng ao, ha thoe, "Empa ke 'Na kabelo ea hao."

<sup>35</sup> Eaba ke a nahana, "Oho Morena Molimo, oh, ho ke ho lule ho le joalo feela, ka hona, Morena. Ke... hobane bohlale ba ka bo ke ke ba lekana ho tšoarana le mosebetsi oa Hao o moholo hakaalo. 'Me ke e—e ke motho ea sa balang. Empa, ha U mpa u le kabelo ea ka, ke oa Hao, 'me U tla ntsamaisa. Nka sitoa ho itsamaisa. Empa, Oho Morena, ntsamaise!"

<sup>36</sup> Lihora tse hlokolotsi tseo ke tsona tse re khothomeletsang mahlabatheng a khethelileng ao. Ho kile ha lula joalo Bibeleng. 'Me le hopole, ho sa tsotelehe boholo ba khatello, Satane a ke ke a tlosa bophelo ba hao hofihlela Molimo o qetile ka uena. Ha ho letho le ka u hlahelang le sa lumelloa ke Molimo. 'Me ha ho

bobe bo ka hlahang bo sa lumelloa ke Molimo. 'Me O etsa hoo molemong oa hao. A re nahaneng.

<sup>37</sup> Mohla meroallo e fihlileng ho timetsa lefatše, o sitiloe ho timetsa Nohe. Nohe a ke ke a timetsoa, hobane Molimo o no mo laoletse mosebetsi.

<sup>38</sup> Ka letsatsi le leng, tlase koana sechabeng se seholo tlas'a bokhoba bo boholo, ho no ho le bana ba Baheberu bao re ba tsebang e le Shadrake le Meshake le Abedneko. 'Me ha fihla moo ba tlamehang ho etsa qeto, ntho ea tlameha ho etsoa. Ba ne ba entse... Tumelo ea bona—ea bona—ea bona ea fetisoa tekong.

<sup>39</sup> 'Me mohla tumelo ea hao e fetisoang tekong, u se ke ua hloleha. Tiisetsa hantle feela seo u se lumelang.

<sup>40</sup> 'Me eare ha ba tobana, tumelo e fetisoa tekong. 'Me ba ne ba khahlane le hora e hlokolotsi. Ha ba ka ba ea e—e thotobolong feela, empa ba kene seboping sa mollo. Empa Satane o sitiloe ho ba timetsa, hoba morero oa Molimo o no o eso phethoe. Ba ka kena teng ka tšepo ena, "Ke a tseba hobane Molopolli oa ka o a phela!" Ba ka kena mono ka tšepo ena mona, "Re khotsoe hobane Molimo o khona ho re lokolla seboping sena sa mollo, empa, leha ho le joalo, re ke ke ra khumamela setšoantso."

<sup>41</sup> Satane o sitiloe ho ba tlosa. O sitiloe ho tebisa Nohe moroallong, ho fihlela morero oa Molimo o phethiloe. O sitiloe ho chesa bana ba Baheberu, ho fihlela morero oa Molimo o phethiloe. O sitiloe ho bolaea Jobo ka mathopa le mathata, ho fihlela morero oa Molimo o phethiloe. Le joalo litau li sitiloe ho ja Daniele, ho fihlela morero oa Molimo o phethiloe. Le joalo lefu le botsofali li sitiloe ho tlosa Abrahama, ho fihlela morero oa Molimo o phethiloe.

<sup>42</sup> Le ka sitoa ho u tlosa, kapa ho tlosa le 'na, ho fihlela morero oa Molimo, oa bophelo ba rōna, o phethiloe. Ka hona, mono re okha, matšeliso.

<sup>43</sup> 'Me ebe hobaneng Molimo o lumella mathata ho fihla? Molimo o qhaneha bothata, o bo kenya litomo molomong 'me a laeloa ho Mo mamela, 'me mathata ao a re atametsa bolekaneng bo haufi le Molimo.

<sup>44</sup> Mookoli o ne o eso hlahe pele ho moroallo. Empa hoba Nohe a hatelloe maemong ao a hae, ho sesisa matsatsi a mashome a mane le masiu, sekhololeng, 'me areka e nyenyane e qhomela holimō le tlase metsing; ke hoba moroallo o fete, ha a ne a bona mookoli khetlo la pele, selekane sa tšepo, selekane sa pallo. Hoba a fete matšoenyehong, eaba o bona pallo.

<sup>45</sup> Le uena u bona tšepiso joalo, hoba u fete matšoenyeho. Esale ke ratile thoko, kapa pesalema:

Na nka isoa Leholimōng  
 Ka moalo o bonolo oa lipalesa,  
 Athē ba bang ba loanne ho hapa mōputso  
 Ba feta maoatle a mali?

<sup>46</sup> Re kōpa boiketlo le khotso. Molimo o re neha ho fetisang hoo O re nehang, liteko le matšoenyeho. Li fetisa boiketlo le khotso. Maiketlo a rōna a mose ho noka feela.

<sup>47</sup> Ke mohla bana ba Baheberu ba susumetsoang seboping sa mollo, ho e 'ngoe ea liteko tsa bona tse hlokolotsi, ke mohla ba boneng ho eme mahareng a bona e Mong ea kang Mora Motho. Mathata a bona a hlahisitse Mora Motho ea emeng mahareng a bona, har'a malakabe, ho phoka leqhubu la lebatama. Empa Motšelisi ha a hla ha ho fihlela ba kene mollong.

<sup>48</sup> Daniele o ne a rere pelōng ho se itšilafatse ka lintho tsa lefatše, eaba o khanneloa tekong, hore o tla rapela Molimo kapa a kene lemeng la litau. Empa ke hoba mofuthu o besoe, 'me a lahleloe lemeneng la litau, hoo, ka morao ho eona, o bone Lengeloi la Morena le eme mahareng a hae, le ntse le leleka, Topallo ea Mollo e khōlō e eme lipakeng tsa hae le litau. 'Me litau ha lia khona ho mo atamela, hobane o ne a fetile liteko le meleko le mathata. 'Me o tsebile Molimo o tla khona ho mo loanela ho eona.

<sup>49</sup> E ne e le Abrahama, hoba a bone mobu o boketa, le komello e patetse, 'me Lota a ikarotse a tlohile ho ea phela ka menyaka lefatšeng. Ke hoba a utloe mefehelo le lillo tsa balisa ba—ba mehlape ea hae, makhomō a hae a hloka joang, empa a tiisetṣa lefatšeng leo Molimo o mo neileng lona oa mo laela ho jaka ho lona. 'Me joaloka letsatsing leo, hoba a lekoe ho fihlela mamello ea hae—ea hae e fihle qetellong, e ne e le letsatsing leo, hoba teko e fete, o buile sefahleho le sefahleho le Elohim tlas'a sefate sa eike letsatsing leo. Ke ka morao hoba a fete liteko tsa hae, hoba a fete mathata a mo hlahetseng, eaba Molimo o ipontša eēna ka sebopoho sa Monna; le ho lula mono oa 'molerella hoba o nyetse le hobane lebitso la mohatsae e ne e le Sara, le ho bolela a Mo tšehile, ka morao tenteng. Ke hona moo Abrahama a Mo bitsitseng "Elohim." Ke ka morao ho teko le matšoenyeho.

<sup>50</sup> Oh, hola Kereke e ka Iphaphamisa feela kajeno, ho fumana hobane ka morao ho mathata le liteko, le litše ho le songoa, lintho tseo Kereke e fetileng ho tsona, Kereke ea pentekosta; hore re bona Molimo lipakeng tsa rōna, o etsa lipontšo tse khōlō, le meeka.

Hoba maima le mathata a letsatsi a fete,  
 Hoba tsohle tseo li fete,  
 Qetellong re tla bona Jesu.

O tla be a nkemetse,  
 Jesu e motle le ea tšepehang,  
 Teroneng ea Hae e ntle,  
 O tla re amohela Lapeng  
 Ha letsatsi le se le fetile.

A re sebetseng, letsatsi le sa chabile.

<sup>51</sup> Banna bana bohole ba baholo, ba ka re amoha bohole ba tšebeletso ea rōna ea hoseng, ho ba thonya. Ba fetile liteko, ba bone Molimo. Ba fetile liteko, 'me ba bone Mangeloi. Ba fetile liteko; le litšenolo, 'me ba bone lipontšo le meeka, le lintho.

<sup>52</sup> Empa, oh, ha ho le a mong oa bona ea boneng seo Jobo a se boneng. Banna bao bohole, hoba ba bone Mangeloi, le ho bona Molimo le lintho tsena tsohle, ha ba bona letho ho ba neha litšepo ka nqane ho lebitla. Empa Jobo o bone tsoho! O bone Paseka. O bone ntho e tšelisang pelō e 'ngoe le e 'ngoe. Hoba e etse, "Oho hola mantsoe a ka a ngoloa bukeng! Oho hola a ka betloa ka tšepe e ngolang, lejoeng!"

<sup>53</sup> Ua bona, eo, tsohle li kile tsa mo hlanohela. Le eëna, esita le bahlanka ba hae ba sa buisane le eëna. Mohatsae e le o sele ho eëna. O ne a lutse mono, thotobolong, teko e khōlō eo. 'Me kereke e tlide, ea mo furalla, matsatsi a supileng. 'Me a ke ke a tšelisoa ke mang!

<sup>54</sup> O tšoanetse a be a bone pono ea Paseka, mohla a neng a hooa, "Ke a tseba Molopolli oa ka o a phela, 'me matsatsing a bofelo O tla ema lefatšeng. Ke a tseba! Oho hola mantsoe a ka a ka betloa ka tšepe, lejoeng, mantsoe a ka a se nyamele, hoba ke a tseba Molopolli oa ka o a phela! Ke a tseba! Ke a tseba!"

<sup>55</sup> O tseba'ng, Jobo? "Ke a tseba Molopolli oa ka o a phela." Na le lemohile, ho ne ho sa phele e Mong feela, empa ho Jobo E ne e le Molopolli!

<sup>56</sup> Oh, ho bokoe Lebitso la Morena. Ke thabetse ho fetoha karolo ea Paseka, ha e le moo ke le karolo ea tsoho eo! 'Me re karolo ea eona hoseng hona, hobane Bophelo boo ba tsoho bo ahile ka ho rōna (ke ho re, mojalefa) bona bo hlahisitseng Paseka. "Ke a tseba Molopolli oa ka . . ." Ebe u tseba'ng? Ha ke e hakanye; kajeno re fumana kakanyo e ngata. "Ke a tseba Molopolli oa ka o a phela!" E, monghali.

<sup>57</sup> Eo e ne e le Mang? Haeba A phetse, E ne e le Molopolli ho Jobo. "Oa ka," leemeli, oa ka, "Molopolli oa ka o a phela!"

<sup>58</sup> 'Me hape u tseba'ng, Jobo? U bone'ng ponong eo? "'Me matsatsing a bofelo, O tla ema lefatšeng. 'Me leha liboko tsa letlalo li senya 'mele oa ka, feela ke tla bona Molimo nameng ea ka, Eo ke tla 'mona ka bona. Ke a tseba Molopolli oa ka o a phela, 'me O tla ema lefatšeng letsatsing la bofelo. Leha meloho ea ka e ka senyeha ka ho 'na, leha liboko tsa letlalo li senya 'mele

oa ka, koana ke tla bona Molimo ka nama ea ka.” Ka ntho eo ho hlahile pono e khōlōhali ho fetisa.

<sup>59</sup> Daniele o bone Lengeloi. Bana ba Baheberu ba bone Mora oa Molimo. Nohe o bone mookoli. Abrahama o bone Molimo, sefahleho le sefahleho. Empa, Jobo o bone tsoho, Jobo o ne a shebile pele. Bapatriareka bohole le bahalaleli ba baholo, ba Bibele, ba kile ba shebella letsatsi leo ho fihla; ka kholiseho, ka lipono tsa bona, ka litšenolo tsa bona, ha thoe ho tla fihla tsoho.

<sup>60</sup> Joale re bona mesebetsi e meholo e tsoeletseng. Re bona matla a maholo a mangata a Molimo. Re bona lintho tse khōlō tseo A neng a ka li etsa. U ke ke ua sheba letsatsi ‘me ua tseba hoba ha se Matla a Molimo a phikolosang lefatše leo le potoloha letsatsi leo. U ke ke ua boha sehla sa selemo se thoasa u sa tsebe hobane Molimo o teng. U ka bona pholiso ea mahlo a foufetseng, litsebetutu, ho tseba hobane ke Molimo. Empa ho ka thoeng holane hoo e le phetho, ‘me hoba re shoe ho felile ka rōna? Empa tsoho, Paseka, oh, ke eona e tiisitseng sohle seo Molimo o kileng oa se tsepisa, e ne e le tsoho.

<sup>61</sup> ‘Me ba tlameha ho fumana thakhiso, pele u ka fumana tsoho. ‘Me pele Kereke e ka khona ho bona Matla a tsoho le ka mohla, pele le ‘na nka bona bosebeletsi bo bocha bo phethisoa le ka mohla, pele u ka kenela setšoalle se secha le Molimo le ka mohla, eka khona u thakhisoe bo-ueno pele tsoho e ka hlaha. Re tlameha ho ichoella mehopolo ea rōna, ho ichoella nqa litsela tsa rōna, ho ichoella nqa sohle se re likileng, ho feta liteko le matšoenyeho, re tle re bone tsoho e ncha, Bophelo bo bocha. Pele moetsalibe a ka fetoha Mokreste, lefu le tlameha ho fihla, e ntoo ba tsoho.

<sup>62</sup> Pele Abrahama a ka bona Elohim, ho ne ho tlamehe ho lebalisoa lilemo tsa teko tse mashome a mabeli a metso e mehlano. Pele bana ba Baheberu ba ka bona Mora oa Molimo, ba tlameha ho feta seboping sa mollo. Pele Daniele a ka bona Lengeloi, a tlameha ho kena lemeneng la litau. Le pele Jobo a ka bona tsoho le ka mohla, a tlameha ho kena le ho lahleheloa ke thepa eohle ea hae; empa eaba, ka pono, o ile a bona!

<sup>63</sup> ‘Me haeba Jobo ka pono a khonne ho ema a tiile hakana holim’ a tsepiso, rōna re tlameha hakakang ho etsa hoo, ka mora hoba Kreste a tsohe bafung e be Thakangoaha ea ba robetseng, le ho romela hape Moea o Halalelang joaloka tiiso ea tsepiso, holim’ a rōna, hore le rōna re phele. “Hobane Ke phela, le lōna le phela ke hona!” Ho bona Boteng ba Hae bo boholo lipakeng tsa rōna, bo sebetsa, bo etsa lipontšo le meeka eo A e entseng holim’ a lefatše, ho re neha litšepo. ‘Me re tla tsohong, ebe re lula lithotabolong tsa rōna? A re theoheng thotobolo kajeno, ka pono e ncha, ka Matla a macha, ka maikemisetso a macha hore re bona Molimo Matleng a Oona. Re bona tsoho ea lintho tse tlang.

<sup>64</sup> Re fihlile nakong ea lefu. Re lutse menyako ea lefu. Lichaba li kahar’ a menyako ea lefu.

<sup>65</sup> Hona joale Rashia e sibolotse sebetsa se secha, joaloka ha bohole le utloile ka radio le ka ntho eo. Ha ba tlameha ho tla koano ho se phatlola ka bomo. Ba ka romela nthoana ea bona mona, le ho kena har'a lihloela, le ho nyanyatsa nthoana sechabeng sefe, 'me mang le mang a holofale lihora tse mashome a mabeli a metso e mene. Ho tla koano 'me, ha u tsoha, Lerashia ke leo le u rahaka lephakong, molebeli e moholo oa Lesharia o hapa ntlu ea hao, a rusulla mohatsao, a lahlela bana ba hao seterateng, le ho hapa lelapa la hao. Ba ka e etsa. Ba ke ke ba lahleheloa ke letho. Ba e tšoere. Ha ho mang ea tsebang seo e leng sona. Ua bona, ntho eohle e sebetsa ho eona. Joale ba ka sebelisa ntho eo ba sa tšabe letho, hobane ho se motho ea e ruileng.

<sup>66</sup> Ha re tsebe kamoo e tlang ho hlaha, se tlang ho etsahala. Empa re tseba ntho e le 'ngoe, re thotobolong. Sechaba, se thotobolong. Lefatše le thotobolong.

<sup>67</sup> 'Me kahobane lefatše le lutse thotobolong, ke thabile ha Moea oa Molimo o ka fihla, 'me re ka re, "Ke a tseba Molopolli oa ka o a phela, 'me O tla ema lefatšeng letsatsing la bofelo!" Tsatsi le leng O tla fihla! Ha ho makatse seroki se ngotse:

Ho pheleng, O nthatile. Lefung, O mpholositse.

Kepelong, O isitse libe tsa ka hole.

Tshong, O lokafalitse ka mehla.

Tsatsi le leng O tla tla, oh, letsatsi le khanyang!

<sup>68</sup> E qositse Gethsemane, ea likhororo tsa Mali tse lutlang letlalong la Hae, pele ho moo. 'Me e qositse mahlomola a sehloho a Kalvari, pele ho ka fihla bopaki ba Molimo oa Bosafeleng O ka tsosang bafu. E qositse—e qositse Gethsemane le Kalvari, ho hlahaha Paseka. Ehlile e entse hoo.

<sup>69</sup> Kamoo baapostola bao, hoseng hoo, mohla ba nyahameng hakana, ho fihlela Petrose a itse, "Ke nyahame haholo, ke a kholoa ke tla ea boela ke tšoasa lihlapi. Ke tla boela ke theoha. Ke, ke Mo bone."

<sup>70</sup> Ba ne ba tšoere litšepo tse khōlō, le ho lumela le ntho eohle, ho fihlela e fihfile nthong e khōlō eo e lefifi. Molimo o no o etsa'ng? O ne a nyollela baapostola bao thotobolong. O ne a ba tlisa tulong moo ba neng ba tla ba ne ba tla tiisetsoa tumelo ea bona.

<sup>71</sup> 'Me Petrose o boletse, "Ke—ke Mo bone a etsa mehlolo e meholo tlase koana Galelea. Empa, oh, O robetse koana, o shoele, o a bata, lebitleng! Ke lumela ke tla theohela leoatleng feela hoseng hona ke lahlele letlooa, ho ea tšoasa lihlapi feela. Koana nka sheba ka ntle holim'a leoatle, 'me ka iphumanelo. Ke sa hopola ke 'Mona mohla A neng a re emetse lebopong. Ke a kholoa nka theoha feela."

<sup>72</sup> 'Me baapostola bao ba boletse, "Ua tseba ke'ng? Ke a kholoa ke tla theoha le uena." Oh, ba ne ba hlorile. Ba ile ba lla ho fihlela mahlo a bona a ruruhiile.

<sup>73</sup> Kamoo re tsebang ho feta libakeng tseo! Kamoo re tsebang kateng! Bohle re tloaelane le lintho tseo.

<sup>74</sup> Ke hopola mohla ke robatsang moratuoa ea theko e thata koana lebitleng, holimō koana leralleng, le bitsoang Eastern, kapa Setša sa Bafu sa Walnut Ridge. Kamoo nkileng ka robatsa lesea le lenyenyan mono! 'Me ke llela liphakeng sa 'me, ho fihlela, ka lla ho fihlela ke sa khone ho lla. Ke e ntse sohle seo ke se tsebileng. Ho fihlela, ke nkile sethunya, ho leka ho ipolaea, ke ne ke kene nakong e kakang. 'Me ka eona hora eo, ka phaposing e nyenyane holimō mane, ke khumame ka mangole, eaba Maholimō a phetleha, 'me ka 'mona a eme mono a apere botlotlehi ba kobo e sa shoeng. Ka eona hora eo ka utloa liphaka tsa hae li kopela mahetla a ka, ho re, "Bill, ha u utloisise. Re betere haholo ho feta uena."

<sup>75</sup> Ua bona, e hloka ho hlahlathoa ha palesa, ho ntša monko o monate ho eona. Bophelo bo hloka ho hlahlathoa, ho fumana bohlokoa bo leng teng ba bona. Jesu o ne a tlamehe ho hlahlathoa ka morero oo, ho hlahisa seo A neng a le sona. O ne a ka sitoa ho ema thakhisong, ho re, "Ke filoe matla ohle Maholimōng le lefatšeng letsohong la Ka." Empa ka morao ho thakhiso, A ka ema 'me a re, "Ke filoe matla ohle Maholimōng le lefatšeng letsohong la Ka!" Empa e entse'ng? E qositse thakhiso pele.

<sup>76</sup> E qositse ho hlahlathoa le ho soabisoa ha baapostola. Ba ne ba bone Mopholosi oa bona, Eo ba mo ratileng, esitile ba Mo bone a tsosa bafu ba tsoa—ba tsoa lebitleng. Ba Mo bone a etsa hoo. Le ho nahana, "Ke eo O robetse mono, a bata, lebitleng, ka Sebele, hoseng hona." E qositse e . . .

<sup>77</sup> Batho ba Mo boneng a tutubolla mahlo a lifofu, ho Mo bona a eme mono a lemoha eona mehopolo e lipelōng tsa batho, "Ebe O tsebile joang," ba ne ba re, "bao ba tlang ho Mo latela? Ebe O tsebile joang? Hobaneng A sa tseba Judase, Judase o ne a—o ne a tla Mo eka? Hobaneng A sa tseba masole a tlang a nyoloha lithaba mono, a tšoere melamu le lisabole le ntho eohle, ho Mo tšoara, haeba A khonne ho lemoha mehopolo ea bona?"

<sup>78</sup> Ua bona, diabolosi o ne a sebetsa ho bona, a ba beha thotbolong, ka ha ba ne ba batlide ho ba neha bopaki ba "Ke a tseba." (E seng "Ke a kholoa" kapa "mohlomong ho joalo.") "Ke a tseba! Ke a tseba!"

<sup>79</sup> 'Me le hopole, liteko tseo tse liheloang li tlisoa ka ho tšoana, le tle le se re, "Be, mohlomong Sena se lōkile, mohlomong Lengolo le nepile, mohlomong pholiso ea Khalalelo e lōkile, mohlomong Moea o Halalelang o lōkile." Empa ha u fumana boiphihlelo boo 'me u theoha thotbolong eo, 'me u fumana tšenolo ea Molimo, ka kolobetso ea Moea o Halalelang, u ka hooeletsa, "Ke a tseba Molopolli oa ka o a phela, hobane O phela ka ho 'na!"

<sup>80</sup> Petrose o itse, "Ke tla ea tšoasa lihlapi." Baapostola ba itse, "Ke a khlooa ke tla tsamaea le uena." 'Me mono thotobolong ea bona, tlase mono bohareng ba leoatle, le bothata bo neng bo hlahile ka mokhoa oa bona. 'Me ke utloa e mong oa bona a re, "Oh, taba ena e ne e ka hlaha joang, Petrose? Ho tlie joang hore Monna ea kang eo a shoe? Ho tlie joang hore A khohletsoe lebitleng ka moo A sebelitsoeng kateng? Ho tlie joang ha A ile a ema a ba tlohela ba Mo tšoela sefahleho 'me ba hlotha litelu, ba Mo bea moqhaka hloohong? Ebe E ka ba Molimo joang le joale, oh, 'me e sa ntse e le Molimo? Ha ke utloisise feela." Oh, masoabi a makakang!

<sup>81</sup> Hang feela, ba sheba lebopong, tšenolo e tšoanang le ea Jobo hantle, mono ba bone seo Jobo a se boneng lilemo tse likete li 'ne pele ho moo. Molopolli o ne a eme mono, a phela a nchafetse, a eme lebopong. Mollo o besitsoe, le hlapi e phehiloe ka mokhoa oo, le ho bolela, ho ba mema.

Jesu o tekile tafole  
Teng bahalaleli ba Molimo ba feptjoa,  
O mema bakhethuo ba Hae "Tloong le je;"  
O fepa ka manna a Hae  
Ho baballa tlhoko hloko efe;  
Oh, eona, ke monate ho ja le Jesu kamehla!

Kamoo re ka e nahanang, kamoo e qositseng lintho tse khōlō tseo!

<sup>82</sup> Kamoo ntho eo... Pauluse moapostola, moapostola e moholo eo ea fetileng nakong ea hae ea mathata mohla a pakileng lefu la Setefane; le ho bona sefahleho sa hae se se nyenyane se lelala nqa Leholimō, le majoe a tlapunya sefahleho sa hae, 'me a lelala a re, "Ke bona Maholimō a butsoe. Ke bona Jesu a eme letsohong le letona la Molimo." O itse, "Morena, u se ke ua ba balla sebe sena." 'Me Pauluse a tšoere liaparo, hoo ho mo behile liveke le liveke thotobolong, a ea morao le pele; ho fihlela, kelello ea Hae ea silafala, ho fihlela a theohile tseleng ea hae ea Damaseka, ho leka ho fohla tsela e tsoang, joaloka monna ea shoabolang botlolо ea wiski, ho leka ho tima masoabi a hae.

<sup>83</sup> O ne a le bohareng ba ntho eo, Puo e tsoile Leholimōng, Leseli le leholo le phatsimang le itse, "Saule, Saule, u Ntlhorisetsa'ng na?" O Mo bone. O ile a Mo elella, hoba E ne e le Jesu ea tsohileng, Eo a 'moneng a eshoa, a boetse a tsohile.

<sup>84</sup> Oh, ke sa hopola bophelo ba ka, tseleng e neng e theohela tšenye hong, ke utloile Puo e monate, "Ke 'Na Jesu. Ke na be ke shoele, ke phela ka mehla le mehla. Hobane Ke phela, le lōna le a phela." Ho tloha mohlang oo, ke kentse letsoho la ka ho la Hae, ka Mo tšepa linqalong tse lefifi. Ho ne ho fihle mohla ke sa boneng, ke sa tsebe moo nka eang, ke sa ntse ke Mo tšepa.

<sup>85</sup> Molumeli e mong le e mong oa Mokreste o tlameha ho sumumeletsoa litekong tseo. Molumeli e mong le e mong oa

Mokreste o tlameha ho behoa thotbolong, a tle a hlahe ka boiphihlelo, “Ke a tseba Molopolli oa ka o a phela!”

<sup>86</sup> Ha re a tla mona hoseng hona ho lula feela le ho qoqa ka taba ea histori, hoo hohle ke ’nete, empa hoseng hona re tlide koano ka bopaki, “Ke a tseba Jesu Kreste ke Mora oa Molimo, ke e tseba ka ntle ho seriti sa pelaelo! Ke a tseba O tsohile bafung, ’me O phela ka ho ’na kajeno. Ke oa ka le ’na ke oa Hae. Ke mojalefa ’moho le Eèena, ‘Musong oa Molimo.”

<sup>87</sup> Paseka! Paseka e hlahisa ntho e khòlò, tsoho, tšepo e ncha. Na u e ruile hoseng hona? Na e lutse pelōng ea hao? Na u a tseba hobane Molopolli oa hao o a phela, ’me O etsa lintho tshole li sebetse ’moho?

<sup>88</sup> U re, “Moena Branham, ke lutse mona, ke emetse mola oa thapelo.”

<sup>89</sup> Molimo o sebetsa hantle feela molemong. Hobaneng moshanyana ea theko e thata eo, letsatsi le leng, a otliloe ka bofofu mohla a neng a tsoaloa? Hore Molimo o tle o tlotsioe o hlanamise motse. Ehlide, Molimo o tseba seo O se etsang. Molimo o a tseba. ’Me O re beha thotbolong, ho re bontša khanya ea Oona.

<sup>90</sup> Ka hona, hoseng hona ke bua sena, motsoalle. Ka mora bosebeletsi ba lilemo tse mashome a mararo le motso o le mong, ka mora lilemo tse mashome a mararo le motso o le mong tsa maima tšimong, mona ke batla ho hlahisa bopaki. Ke bone masoabi. Ke bone mohla ke kòpileng lintho, le ho llela lintho, le ho qela lintho, ’me ha ke a li fumana. Empa hola nka emela Molimo ka mamello, ke a tseba e sebetsa hantle feela, ho hlahella hantle feela, ho etsa ntho e lòkileng hantle feela.

<sup>91</sup> Mohla ke ne ke lahleheloa ke lesea la ka, Sharon oa ka e monyenyan, ke... e le eona ntho e nkhopileng. Ka re, “E ka ba molemong joang? E ka ba molemong joang?” ’Me likhoeli hamorao, eitse ha ke ’mona a eme mono ka botle bohle ba ngoanana e mocha, a buisana le ’na, pel’ a koloi ea khale e robehileng. Ke ile ka tseba, holane a phela, o ne a ka tšoha a nkile tsela e phoso. Molimo oa na oa tlameha ho mo tlosa a sa le bonolo a le mosa. Ke tseba hoba ke tla boela ke ’mona. Ke tseba hoba ke tla ’mona, ke e tseba ho se le seriti sa pelaelo.

<sup>92</sup> Ke hopola mohatsa ka oa lilemo tse mashome a mabeli a metso e ’meli, ha a ne a nkua, e le ngoanana feela, ’mè e monyenyan mono. Mohla lipampiri hlahisang lihlooho tsa litaba mona, “Mè e mocha, moruti..., o shoa feela,” oh, kamoo pelô ea ka e lutlileng mali! Ke sa tsebe seo nka se etsang.

<sup>93</sup> Empa kajeno ke a tseba e ne e sebetsa molemong oa ka. Ke a tseba hobane bophelo bo ne bo tlameha ho silakanngoa, le ho sothoa, le ho tlanngoa, ho fumana se neng se le kahare, kantle. Branham o ne a le mongata haholo ka mono, a tlameha ho phatluoa pele Molimo o ka Itsebahatsa.

<sup>94</sup> U ne u le mongata haholo ka ho uena, ho fihlela Molimo a tlameha ho e tlhotla, ka liteko. 'Me ha e hlahlathoa, ho thata. Empa ka morao ho nakoana, maholimō a phetleha, ebe moo u bonang morero oa Molimo. Ebe u a hooeletsa, "Ke a tseba Molopolli oa ka o a phela, 'me O tla ema lefatšeng matsatsing a qetelo! Leha liboko tsa letlalo li senya 'mele ona, koana ke tla bona Molimo nameng ea ka!" Liteko tse nyenyane tsena le lintho ke tsa nakoana feela, 'me li a nyamela li a feta. Empa li reretsoe molemo oa hao, re mpe re hopole taba eo, Molimo o tle o tloltisoe.

<sup>95</sup> Na re ka inamisa lihlooho tsa rōna nakoana feela. Ke batla ho botsa, pele ho thapelo, ba teng mona ba ratang ho hopoloa lentsoeng la thapelo pele re koala? Molimo a u hlohonolofatse. Ba bakae ka mona ba ka reng, "Ke batla Molimo, horenq ea teko ea ka joale, ho mpha boiphihlelo bo bocha, ke tle ke tsoe ke le mocha hape"? Phahamisa letsaho la hao, u re, "Ke batla—ke batla ena e be tsoho ho 'na, Paseka, ho ntsoetsa litšepong tse ncha le matleng a macha, bophelong bo bocha bo koenneng le thabo e ncha." Molimo a le hlohonolofatse, batho ba heso ba ratehang.

<sup>96</sup> Oh, Molimo oa rōna le Mopholosi oa rōna, re U leboha haholo ka Paseka ena, ka seo e se bolelang lipelōng tsa rōna. 'Me ka tumelo, hole koana, mose ho lefatše, re ka bona ho Khutla ha Morena, Jesu, A sa ntse a Itokisa joale, ho apara liaparo tsa Hae tsa bokhosi. 'Me, le Kereke e ntse e apara, Monyaluoia o ntse a apesa seaparo sa Hae sa lenyalo. Köpano e khōlō e mothating oa ho etsahala kapele.

<sup>97</sup> Thotobolo ena ha se ea ka mehla. Ha re utloa batho ba tšehang, ba iqabola ka rōna, ba re bitsolla ka lebitso la "mohalaleli-bathethehi," le ho re soma, ba re tlaleha re sa nke hantle kelellong, oh, ha se ea ka mehla, Morena. Re mpe re etsise Jobo, re tiisetse bopaki ba rōna, re tšoane le Danilele lemeneng la litau, kapa bana ba Baheberu seboping sa mollo, kapa Abrahama leetong la hae.

<sup>98</sup> Re thusé, Oho Morena, ho ema ka 'nete ho fihlela re bona ntho e khōlō eo e etsahala, "Mohla terompeta e tla lla, le bafu ba shoetseng ho Kreste ba tsoha; rōna ba saletseng ba phelang re tla fetoloa, ka nako le motsotsa, ka ho panya, leihlo." 'Me Paseka eo e tla re tlela, eo Kreste a ileng a e thabela lilemo tse batlileng ho ba sekete le makholo a rōbong tse fetileng hoseng hona, le ho re, "Hobane Ke phela, le lōna le phela ke hona."

<sup>99</sup> "Jesu enoa, ea nyolotsöeng har'a rōna, o tla khutla ka moo A tsamaileng." Re tla Mo bona, esita le mongoapo ofe le ofe letsohong la Hae le tšehtlo efe le efe hloohong ea Hae. Re tla 'Mona.

Oh, ke tla Mo tseba, ke tla Mo tseba,  
Ke tla ema hlakoreng la Hae ke lopolotsoe.

<sup>100</sup> E, Morena, pelona ea ka, 'mele oa ka o tseremang ha o qala o nyebella tlasa moroalo, mokhathala le boima ba masimo a kotulo, masimo a boromuo, le meepa le metheo, le liphapang lipakeng tsa bareri ba khohlahetseng, le ba joalo, tikolohong eohle ka bophara, le batho ba sehollang, le matla a mabe. Empa, Oho Morena, tsatsi le leng re tla fihla joaloka Elia, tlase nokeng; ho sheba koo, ho qhanehiloe sehlahleng se seng le se seng, koloi ea mollo e tlang ho re jara e re tlosa. Re mpe re tsebe hoba lithotobolo tsena e mpa e le masira a re patelang ntho e khōlō eo e larileng ka pel'a rōna, khanya e khōlō eo.

<sup>101</sup> Re lule re tiile joaloka Jobo, ho fihlela re ka bona Eèna, sefahleho le sefahleho. Re tiisetse joaloka Morena oa rōna, e leng mohlala oa rōna, ho ea Kalvari; le rōna, re ikemiselimtse ho thakhisoa, le ho thakhisoa le Eèna 'moho, tsoho e tle e hlahe bophelong ba rōna. Aba sena, Morena.

<sup>102</sup> A ho be joalo, ha baseholli ba le teng mona, ba tšoanang le Pauluse oa boholoholo, ba sommeng, ba fumane Paseka tseleng ea bona e eang lapeng hoseng hona. Aba sena, Morena.

<sup>103</sup> Re a rapela, Morena, bao ba lutseng thotobolong ea tšenyeho, thotobolo ea maloetse, e be hora eo ba tlang ho loeloa ka eona.

<sup>104</sup> Maobane bosiu, ha ke ntse ke qoqa le mosali eo karafaneng, le mohatsae; kamoo koana Phoenix, ka maemo a nyuarosang, ba ne ba tšoeroe ke mefetše e meholo eo, le kamoo kajeno ba phetseng ka ho phetheha ba boetse setloaeling. Le lesea le neng le tla ntšoa pelō, le lutse mona ka moahong hoseng hona, le phetse, le koenne. Moshanyana ea kileng a tsamaea lefifing a eso bone leseli la letsatsi, kajeno o a tsamaea o bona leseli la letsatsi. 'Me, Oho, Molimo, re U leboha hakakang ka eona! 'Me ntho eohle e shebile mose ho lesira, letsatsing le leholo leo la tsoho. Aba sena, Ntate. Le ho ba tsebisa hobane lintho tsena li ne li tlamehe ho lula joalo, hore bana: moshanyana oa sefov a tle a bone, ngoana ea jeoang ke pelō a tle a hlahisetse ba bang bopaki. Lintho tsena tsohle li sebetsa 'moho molemo oa ba U ratang.

<sup>105</sup> Khonahalo ena eohle e teng ka lebaka la kutlo ea a le Mong tekong, e Mong O ile a emela teko, e ne e le Jesu. Ea ileng A ba le kutlo ho Ntate, ho fihlela Ntate a Mo tsosa hoseng ha Paseka, hobane lefu le be le ka sitoa ho Mo tšoara. "Hoba Nke ke ka lesa Mokhethoa oa Ka hore a bone ho bola, le joale Nke ke ka tlohela moea oa Hae liheleng." Hoba, O fumanoe a tšepahetse, ka mehla A etsa ho khahlisang Ntate.

<sup>106</sup> Molimo, re ke re tšepehe temeng ea tšebetso kamehla. Ho sa tsottelehe teko ea rōna le mathata a rōna, e ka bang eng, re ke re tsebe ho bolela, ka mehla, "Ke a tseba tsohle li sebetsa molemo ho ba ratang Molimo." Aba sena, Ntate.

<sup>107</sup> Re hlohonolofatsa batho bana hoseng hona ka mahlohonolo a Hao. Ba tlide hoseng ba tsoa litulong tsa bona, ba tlide tabernakeleng. Ba tlide ho fumana matšeliso. Ba tlohe ba ea

malapeng a bona hoseng hona, Matla a Moea o Halalelang a ntse a tuka lipelōng tsa bona, ba tsamaea tseleng joaloka ba tsoang Emmause, ba ntse ba re, "Ana lipelō tsa rōna li ne li sa chese ka ho rōna, ha A ntse a buisana le rōna tseleng?" Aba sena, Ntate. Ke ba laetsa ho Uena joale, ka Lebitso la Morena Jesu Kreste. Amen.

Ho lōkile, Moena Neville. 'Me joale le hopole litšebeletso.

<sup>108</sup> Hoseng hona re ke ke ra nka littlankana tsa thapelo, hobane seo, ha re ka tšoarana le littlankana tsa thapelo, ha ke emisa batho ka tsela eo, ke sa ntse ke itšetleha ka neo eo. Ke tšoanelia ho fumana moo nka e beellang kathoko, moo nka tsoang mona le ho ka... Ke a tšaba. Ekare ke tšohile, 'me ke tšaba hoba nka etsa phoso. Ho lahleheloa ke khato, ha se ho lahleheloa ke ntoa. Patton o ne a lahleheloe ke likhato tse 'maloa, empa ha a ka a lahleheloa ke ntoa. Ke hantle. 'Me re tla lahleheloa ke likhato tse ngata, le rōna, empa re ke ke ra lahleheloa ke ntoa. Ke tla etsa liphoso tse ngata, empa nke ke ka lahleheloa ke Pheo. Molimo o nehelane ka eona, 'me Molimo o tla e hlokomela. Ke—ke tlolo. 'Me hona joale ke nako, ke a lumela hora e fihlile, 'me ke ntse ke qala, ka ha e le letsatsi la Paseka lena, ke tla tloha ho ea—ho ea etsa ka tloaelo ea ka ho ea rapella bakuli. 'Me ha nka khona... Ke tlolo. Ntho e tlameha ho etsahala ka ho 'na. Ha kea e tloaela. E fihla ka mokhoa o tjena, nka tšoha ke sa e hlahlobe ka tšoanelo, empa ke tšoanelia ho 'na ke e khutlela ho fihlela ke tsebile nako le nako. Ka hona lena e tla ba letsatsi leo ke tla leka ka lona, ka mohau oa Molimo.

<sup>109</sup> Morena a le hlohonolofatše joale. Moena Neville. 'Me litšebeletso li tla qala ka mashome a mararō ka morao ho robong. Moena Neville.



*KE A TSEBA SST60-0417s*  
(I Know)  
MOLAETSA OA PASEKA

Molaetsa ona ka Moena William Marrion Branham o reriloe sethatong ka Senyesemane, Sontaha sa Paseka hoseng, 'Mesa 17, 1960, Branham Tabernakel, Jeffersonville, Indiana, U.S.A, o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2019 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)